

De telles parolles il n'y a personne qui ne coniecturast que c'estoit quelque farce ridicule, vn fessennin ou attelane, quelque mommerie et charlatterie où les pantalons s'entrechocquoyent aux despens de la devotion et reuerence des choses saintes. Malignité et fausseté impudente ! Vous auez veu (messieurs) comme tout s'est passé ; y auez-vous rien noté qui ne fust graue et moderé ? Rien que de deuot et conuenable à la maiesté de l'histoire et du suiet du iugement vniuersel qui se representoit. Quel mot de gueule y a on ouy ? Quel parasite ou mime y a esté remarqué ? Quel geste dissolu ? Quelle action legere ? Je scay de bonne part que plusieurs ont esté excités à mieux vivre, voyant en ceste action quelques declinements de ce qui doit arriuer au dernier iour.

En suite de cecy il fait subtilement ce de quoy il accuse proditoirement les iesuites, tournant en risée tout ce qu'il y a de plus seuer et espouventable en notre sainte creance. Il appelle drolerie ce qui fut représenté d'horrible selon la necessité du sujet, touchant les diables et les damnez ; et pour cela il cite son resueur Camerarius, ne faisant qu'vne pure drolerie de tout son recit, drolant partout, et gaussant en vray Lucian : puis donnant le vent à ses mensonges, il parle ainsi :

« En ceste Comedie il y auoit diuers personnages, entre autres vn dieu iesuitique, et en après vn Iesus Christ à sa dextre. »

Qu'est ce mentir (Messieurs) si cela ne l'est ? Vous sauez qu'en toute l'Action aucun ne fut veu qui representast la personne de Dieu, comme distincte de celle de Iesus Christ, et qu'vn seulement exhiba celle de Iesus Christ comme de Dieu et homme, iuge des vivans et des morts. Ce menteur deuoyé est, peut estre, quelque Nestorien, distinguant en Iesus-Christ deux personnes, aussi bien qu'il y a deux natures : et en ce plus que Nestorien il s'imagine qu'au iugement vn siege sera donné à la divinité, et l'autre à l'humanité de Iesus Christ. Car si telle n'eust esté sa pensée, comme auroit-il